



談戀愛

秋天是一個浪漫的季節，最近身軀邊定聽著一寡「相思」的代誌。相思，敢真正無藥醫？我就來開一下仔藥方咧：症頭較輕的，隨敲電話講五分鐘隨好，因為怨無無怨少；較嚴重的，加一味寫電子批抑是傳『line』，按呢對方就未「賴」(luā)你害伊欲死毋活，會感心有「依賴」(i-lāi)，有人司奶袂悲哀；啊若想甲咧欲扛去埋(tāi)，嘛是簡單，緊約食飯迫迫開講泡茶，保證見面笑哈哈。講來講去，這帖藥方並無特別的所在，簡單來講就是「講」！莫怪叫做「談」戀愛。

人講「談」情「說」愛，講天講地，講過去講未來，雙人只要有意愛，清彩開講嘛聽了心肝嘍嘍恂，笑甲喙仔裂獅獅。開講除了訴情意，另外閣有背後的意義：無講，人哪會知？談戀愛若會成，就是愛講甲伊捌，毋管喙鬚拍結，講甲伊知，毋管日頭倒頭栽。開講才有機會互相了解，知影咧想啥、佻意啥、有啥向望、有啥怪癖。「戀」是毋管頭起先按怎千「變」萬化，會共對方囡佇「心」肝，「愛」是真「心」接「受」，優點缺點照收。所以，戀愛絕對毋是開大錢買璇石、送皮包子、食豐沛的飯菜，是三不五時開淡薄仔時間開講了解，沓沓滴滴累積出來的。

嘛愛會曉按怎「談」。有的人，喙有拍開，毋過，耳仔塞牢咧，盡講伊家己歡喜、講家己佻意、講家己要求的代誌，人攏袂當觸(tshik)伊的意。這款叫做演講發司令，無算「談」。因為「談」有燒燒兩樁火，是兩個人講甲熱怱怱(jiāt-phut-phut)，若欲到戀愛的地步，就愛注重「戀愛」兩字有「心」上要緊的啟示。兩人熟似，毋管是講厝內、講市內，會曉講的是中(tìng)人聽、擦著對方的心內。喔！毋過千萬毋通「便所內彈吉他」，傷勢臭彈，予人聽著是會倒彈，嘛毋通做假有心的六月芥菜，好詼諧、漚腹內，龜趺趺出來。

談戀愛是一世人的代誌。巧巧仔人，攏嘛知影結婚了後，愛繼續和嬌某抑是緣投仔翁開講，毋管雞喙鴨喙，上好是聽某喙大富貴，聽翁喙那褒那掌顧伊的志氣。按呢！睷全一領蓆，掠君心肝掠會著，永遠熱戀、相思、迷醉！

作者：王秀容

☆詞彙學習☆

【症頭】tsing-thâu：病症

【詼諧】khue-hâi：風趣

☆文法學習☆

【聽著】：文中「聽著是會倒彈」中的「聽」讀變調、「著」讀本調，表示「聽了（之後的感受）」；若「聽」讀變調、「著」也讀變調，則後面必須接受詞，表示「聽到（什麼）」；若「聽」讀本調、「著」讀輕聲，則後面不加其他詞彙，表示「聽到了」。